

Ebereecuru rai

letoi

Rai Calaohi aina cuaainte cachaauru rai erelu Cana Coaunera.

1 ¹Inoaelu jetaote nere bera inoasesihuru- *profetacuru* aina cuaain araaisaain cana inoansihuru rai ere Cana Coaunera, ecoetacaaneen mituhelanaala, taba que acaauru sinihu, taba que letonocuru anjeraauru letoae, acaauru rai ecocohin beeuruhane coina, naaonjoaain. ²Nete laen inae enene Calaohi que nere berate Cana Coaunera, Cana Coaunera nihane coitucuhacache itolereeneinne coina. Nii rai Calaohi aina cuaainte, itolere cana rai chauratane, dede, itolere cautenu rijihuru, itolere cana janonaa, naaonjoainuri coaunaain niichuru Curuaanaa neein telu Cana Coaunera.

³Nihei chunei cacha niqui Cana Coaunera coaraai. Nete caje uhin canaacaanu rene ecooca rai Calaohine jaun, canaacaanu rohan turuaain coaracaanune jaun, “Naaonjoaan Cana Coaunera,” naain coitucuhacaanu, jeelai Cana Coaunera tochaneen necaoha-chaain nichao que ichaohana jaun. Acate Cana Coaunera Calaohineen itolere sirichaneen coaraneein ne. Acate Cana Coaunera Calaohineen caa chauratane que ohelu, jianacoon osa caje cana mitaeranu que. Nitohaneente inae osa caje cana mitaeranu que ohane baiha, rai Inaca Cana

Coaunera raotono nichajai que rori- *trono* ichoae nelauriaa cuelu.

Anjeraauru amurijiriinte cocoinanojoneein ne Cana Coaunera Calaohi.

⁴Jataain rai letonocuru anjeraauru cocoinaane amurijiriinte, rai Calaohi cocoinaelu Cana Coaunera, acaauru amurijiriin nihane coina. ⁵Nitohanihane jaun, nihei chuni letono anjera rai:

“Iite cacalabineen canuhacha jereinein canuhacha teineein nenaaneeicha,”

naain irihei Cana Coaunera. Niheichu chuni letono anjera que:

“Leinjiin acaacha canu calaohineein nihane janana, Canu, leinjiin inaca neein nereeunicha,”

naain irihei Cana Coaunera. ⁶Caa chauratane que nenacaauru cachaauru que, leinjiin acaacha rai calaohineein nihane coitucueratihane coinatae laen:

“Quere tonoraain canu coroaeequichene rijijieein, jerichanejeein nere tonoraain coroaeequiche satiin,”

nae, rai letonocuru anjeraauru rai, Cana Coaunera. ⁷Nii rai letonocuru anjeraauru quete laen:

“Canu letonocuru- anjeraaurute laen
aiha cujuanane rijijieein, usi
rijijieein
naonjoaain canuhacha jerei ichara-
neein neeurueein,” nae Cana
Coaunera.

⁸Jana rai Calaoihi quiete laen:
“Chabana sarinaain
itolere Curuaanaa neein-
itolere Coaunera neein neeine.
Chaen techu
chabana satonoenereein
caohacha ichaain neeine.

⁹Nii rijijieein techu
caohacha nejesina ichara
curuaanaa neein neeina jaun,
esinae rauhijiriin
baaso ichaain nenacaauru aina
nejerateein,
caohacha icharaauru belairiquiin.

Nii coinane
Canu, Itolere Coaunera neein
ii Coauneranichaaunne
ii tein neeun,
ii, jataain
leechaaauru amuritoheriin
raotojoeein rachoojoeein
neeine caina,”

nae Cana Coaunera.

¹⁰Chaen techu:
“Ii canuhacha tei
Curuaanaa neeineten,
jauriaanejeein
nunuhe caje coauneein niha
cana rai chauratanene caina
aitiin dede coaunaailu.
¹¹Satiin iicha coaunanojoite sareein.
Jana iite laen chabana nitajene-
reeini.

¹²Inae ecu tihane banate,
siriteein saa cajionene jaohin,
enachasine que coreein jianaa
rijijieein,
janonaa coreriquiin.
Nete laen,

ii chabana satonoelanaala
ichaoriqiin,”

naelu rai Calaoihi rai Cana Coaunera.

¹³Nii jaun coatitha chuni, rai letono
anjera rai:

“Chajaaute
caraaotono nichajai que nelaau-
riaena,
ii tijia asaae
iniha nejeratenacaauru
amuritiin tee te coaraaicha,”

naailu Cana Coaunera. Chabana nii
Calaoihi que aitohane rijijieein letono
anjeraauru que irihe.

¹⁴Nechu raujiaain ichoterateno-
joineein nerichaacheeinne rai, cha
beraneeichate suujueneein Cana
Coaunera tenojoineein neure rai
anjeraauru.

**Cana ichoterateraneein nenea que
jaoleconaa nainihaacache.**

2¹Nitohanihana jaun, nere beracuru
que Cana Coauneraacha beratei
aonaain tonoraain- esenetaain
nihacachenete caohachae. Jana nii cana
rai niicha beratenojoin aonaain
caohatiin coitucunaa saijieein tonorae-
nihacachenete, aihuruha coitucuela-
naala nenacaaurune rijijieein nitajeri-
chaacheein. ²Coaracuche nachuhinti, nii
rai letonocuru- anjeraauru que niicha
teratei niha nii rai jauriaanejeein nenea-
rauhine saijieein tonoraelanaala
naosatenacaauru cachaaauru- esinae
rauhijiriin baaso ichacuruhane coreniha
caseteco coaracurualune. ³Nitoha-
nihane jaun, caseteco caje nichotenaa
nainerihacacheein, nii jauriaanejeein
nenea amuritoheriin, cana ichotera-
neein nenea esenetaenihacachene.
Esenetaain nihacachene coinete,
jauriaanejeein raaje nihane cana rai
beein nelu Cana Curuaanaa Jesocurisito.
Nii baihate cana rai beurelu aina

amuhemujueein nota que coaraaauru.
⁴Nii ichoae tacaain techu, cana que coitucuerate Cana Coaunera itolere cojoelanaacojoaihuru ichaain. Chaaen techu Aca jerihane rijijieein, le cacha nichaachene rai niicha tei- Suujue aina cuaain cana que coitucuerate.

Cana nejera rijijieein niha Jesocurisitone

⁵Coatiba rai letonocuru anjeraauru, nii cabaiha neenihu rai Cojoanona caa ereereecaachene jaan coaraneein neeuruhane coina aitohi Cana Coaunera.

⁶Nitohanenihane quete:

“Chaneein ne cacha.

Chatohananeeina nenaane cacha.

Chanuna acaacha coacuhin,

jataaen queecha coaauqui.

⁷Jauriaanejeeinte niqui

ii letonocuru- anjeraauru

cocoinaaine fautaain cocoinaailu.

Nete nii baiha laen,

jataain leeochoaauru amurijiriin

cocoinaain,

que itolere Curuaanaa nihane comai

lauriaain,

⁸satiin nere tonoraain

neeuruhane coina ichaain,

tijia asaae que nejeratenacaauru

teeilu,”

naain ne laenanohineein Cana Coaunera Quiricha cuhane. Nitohaneein satiin nere tonoraain nihacachane coina, cocoinaain rai tijia asaae que nejeratenacaauru tihane coina, aitohane saijieein jaiti nitohaneein ichaa Cana Coaunerane coarahaacache. ⁹Nete laen, inae anjeraauru fautaain nelatihei rijijieein turuhin nihalu carajaojoaain Jesocurisitone coaracaache. Nitohaneein turuhinte, rai chaneein nenihacachene saijieein, jataain cana belaitohane jaun, cana coreniha ohane coina ichaelu Cana Coaunera. Nii cana coreniha cairichanojoneein ohalune corenihate,

itolere curuaanaacuru Curuaanaa neein nihane cojunacaneein necaohachaa Cana Coaunerane que comaiteno-joineein ne.

¹⁰Satiin itolereite Cana Coaunera raineein ne, niicha coaunanojoneein niha itolereine jaun. Nii jaunte niicha coaunanojoneein rai calaohi neein nihacachene jaun, rai Cojoanona caa baiha neeni que nihacachene jere Cana Coaunera. Nii jaunte cana coreniha necairichaa Jesocurisitone aina cuaain, nii aansijiiniiji osa colane telu, satiin niicha coaunanojoinunru ichoteraneein nihane coina. ¹¹Nitohanenihane jaunte, ita Inaca que Inacaain nihacache, nii cana osa caje cana ichoteratera aina jiniiquin. Nii jaunte, rai nejera neein inae nihacachene jaun coejelanaala: “Canejeraauru,” nae cana rai Cana Coaunera Calaoi. ¹²Niritorichaine quete:

“Canejeraauru raine

Iinein neeine beebejeein,

netaojiaain

Ii coroaeraauru cataaun

nenatereeeunni,”

naalune, laenananojoneein nelu Cana Coaunera Quiricha cuhane.

¹³Chaen techu:

“Leinjiin Acaachane

niicha ichai ichaane coina

cohajereeeunni,”

naain.

“Cauna neeun,

canu rai Cana Coaunera

tenojoihunru- cacalabihuru

ainara,”

naain ne laenanohineein.

¹⁴Charijieein teeinti, ita araaneein niha cachane, ita iniho que inihoquiin, ita coichana que coichanaain, naaonjoaen cacha, nii rijijieeinte cacha iniho que inihoquiin cacha coichana que coichanaain naaonjoaelu

Jesocurisito, caa chauratane que ohin, nii cacha itajeraneein nenea moconajaera amuritothane caina. ¹⁵Nitohaneein moconajaera amuritiinte, ohin nitajeeururichaaine que satiin casiiriin ichaonacaauru- cachaauru ichoteratelu.

¹⁶Aihane jaun, coatiha anjeraauru coroatajanihane caina turuhin niheilu, Abaraan nefeerateneein nenacaauru coroatajanihane coinata turuhin nelu.

¹⁷Nitohanianhane coinata, jerichanejeein cana nejeraneein, nihacachene rijijieein tenojoineein nelu, Cana Coaunera notaracae coujurihi cana rai saseredotecuru curuaanaacuru Curuaanaaneein, cairichaojoaain cana coaraain, cana coreniha cairichei coaraain ohane, satiin cachaauru osa que suujua acatena nainiha Cana Coaunerane caina.

¹⁸Nitohaneein raajenihane necairichanaa coaraain, cojunojineein nihalune jaunte, rijijieein necairichanaa coaraain, cojunojineein niha cachane coaraane, coroatajanein naonjoaen.

**Moisesa amurijiriin
cocoainanohi niha Jesusone**

3 ¹Canejeraauru, aihane jaun Cana Coaunera ranojoineein, inae rai cachaneein neechene jaun, niicha icharatenohi icharaanu que niicha tei-Jesocurisitohacha que coaauce.

Nariha jataain coreniha chabana satonoelanaala esenetaacachene jaun.

²Jerihane rijijieein nere tonoraain niha Jesocurisitone jaunte, niicha icharatei icharaanu que cocoainaan nelu Cana Coaunera. Nii rijijieein techu, Cana Coaunera cachaneein nenacaauru aina, niicha icharatenohi icharaneein nelu Moisesa. ³Charijieein teeinti, niicha jai loreri amurijiriin jataain nelateineein ne loreri ichara, nii rijijieeinte, jataain Moisesa amurijiriin nelateineein nelu Jesocurisito. ⁴Itolere lorerite, niha

icharane jaun neein naonjoaen. Nete laen Cana Coaunera coaunaane jaun, neein naonjoaen itolere. ⁵Nii rijijieein techu, rai cachaneein nenacaauru rai Cana Coauneraacha icharatei icharaneein nihane jaun, raujiaain nota que coaraain, que niicha beratei beraneein nelu Moisesa. ⁶Nete laen rai Calaohi Jesocurisito, cana rai cachaneein- rai loreri rijijieein nihacachene amurijiriin, cocoainaan cana inana neein telu. Nii jaunte, rai loreri rijijieein nerichaacheein, esinae rauhijiriin jerihane rijijieein neein, chabana cohajihacachene coiinteein jianelanaala canaacha cohajei cohajihacachene.

**Acaauru que Cana Coauneraacha
banihatihu turuurenerichaa in rai
cachaauru tabaaurune**

⁷Nitohanianhane jaun, rai Quiricha Inoaensi cuhane:

“Enene cojoanonaa
cuhane inara rai niicha jerei
biha Cana Coaunerane,

⁸jiaonriha

inara suujua aohana jerelanaala,
aihuruhalu nere tonoraelanaala,
nechu acaauru casetecaa
Cana Coaunerane cojuhin coaraa
cacha areroo ichatane janane
rijijieein nihache.

⁹Ecute

jenachoonca jaanacaneein
mainajeriin acaauru notajaain,
acaauru coroatajanichaaunne
saijieein,
acaauru casetacaanune coujuha
quere tonoraurenelu- inara foerate-
racuru.

¹⁰Nii jaunna,

nii inara foerateracuru aina
obajein:

‘Nechu itolere bana

joanreein rai suujua cuaauruhane
jaunte,
acaauru que
canuhacha coitucueratena
jerei coitucunaa jerecurene.’

naain:

¹¹Aihane jaun,
coatiha acaauru que banihatein
canuhacha rucujueihu
turuururinaain,”

naain biha Cana Coaunera Suujuene
jaun ne laenanohineein.

¹²Aihane jaun canejeraauru, le cache
nequichene- inara netonai nabana cana
rai Cana Coaunera beratei esenetaain
neeichene jianequichene coataa, que
nainaain necohalajiin ichaaoche.

¹³Nitohanein nena coacuelanaala,
jianeein lecacha nequichene jiniiquiin
ita suujua lararajiaain neeuche: “Enene
cojoanonaa,” naain aitoha Cana
Coaunera Quiricha cuhanena jaan que
turusihane ajiniha. Nabana inara
tabaauru saruhin niha osane,
rijitojoein chatohanai ichaquichene,
inara netonai canaacha esenetai
esenetaelanaala naitoonjoan tonorae-
neeichene coataa. ¹⁴Nitohanihane jaun,
esinae rauhijiriin Jesocurisito aina
nena jerichaachene, nii esenetaaca-
chene bana canaacha cohajei que
turuhane reentiaain esenetaacachenete
ne.

¹⁵Nii cointate:
“Enene cojoanonaa cuhane
inara rai niicha jerei biha
Cana Coaunerane,
jiaonriha
inara suujua aohana jerelanaala,
aihuruhalu
nere tonoraelanaala
nenacaaurulune rijijieein nihache.”

nae Nere Inoaesi.

¹⁶“Charijihuru Cana Coaunera ere
aonacuruhane saijieein nii baiha nere

tonorana jerecurenelu,” naaichena.
Acaaurute, satiin Egipto batane caje
Moisesaacha rocoorinelu. ¹⁷Nii
jeelaihuru que techu, nitohanein nere
tonoracurenihane jaun, acaauru que
nejeratein acaauru coroatajanihane
jianiha jenachoonca jaanacanein Cana
Coaunerane jaun, ichataneu cache
areroo satiin ohacoaurelu. ¹⁸Chaen
techu nii jelaihuru, rai nitohanein nere
tonoracurenihane jaun, esinae
rauhijiriin acaauru que banihatein
niicha rucujuihu enoorenerichaaaine que
aitelu Cana Coaunera. ¹⁹Nii jaunte,
esenetacurenihane coreniha nii acaauru
que banihatein niicha rucujuihu
turuurenerichaaaine coitucuhacache
raotojoein.

4 ¹Aihane jaun, jaiti cana rai niicha
teeni, rai nebetacanaa cojoanona
tihane rai niha Cana Coaunerane jaun,
ecu turunaa nainichaachene coina,
jataain necohalajiin ichaohacachenete
caohachae. Nabana inara tabaauru, ecu
turunaa nainecurenihane coataa.

²Nitohanein cana netonai ecu
turunaa nainichaachene cointate, nii
Moisesa que beratihalu acaauru raine
rijijieein, cana rai netonai beratelu.

Nete laen inacojoein acaauru rai
beratelu, aonacuruhane saijieein,
aihuruha nii niicha beratei esenetaain
tonoraeraaurune rijijieein, acaauru
netonai esenetaaurenihane jaun.

³Nete laen cana, esenetaera neein
nihacachene jaun, nii Cana Coaunera
aitoonjoan- nebetacana jaau enorichaa-
cheein. Nitohanein nere tonoraaururi-
chaaaine jaun, aitorichaaaine quete:

“Nii jaunna obajeein,
esinae rauhijiriin
nebetacaanune jaau
turuurenerichaaaine que aitoon”

naain belu Cana Coaunera. Nete cana
rai chauratane coaunaane nainaalune

caje coauneen nelu, nii nebetacanjaa cojoanona naitoonjoa.

⁴ Nii jaunte rai Quiricha Inoaensi cuhane:

“Caainsi janone cuhane jetaote, itolere coaunaane nainaan- bana nebetacaelu Cana Coaunera,”

naain laenanohineen ne.

⁵ Nii baihate coaiteen rai Quiricha cuhane, nii Israelitacuru que:

“Coatilha canu nebetacana jaun turuururinaain,”

naalu Cana Coaunerane, ne laenanohineen.

⁶ Nete, nere tonoraain ichoterateno-joineen neeurichaaaine aonacuruha ichoaichaniha natiin, esenetacurenihane jaun, nii nebetacana jaan Cana Coaunera aitoonjoaun turuureniha Israelitacurune coina aitohalune saijieen, jaiti neeure satononiha nii naitoonjoan esenetaeraauru, acaauru coreenraniha nii nebetacana jaun turuheninuunru.

⁷ Nii jaunte, nii nacoauneen le janonaa que cojoinacate Cana Coaunera:

“Enene cojoanona,”

naain. Nii Quiricha Inoaensi caje coitucuhichene rijijieeinte, que beratilha Cana Coaunerane jaun:

“Enene cojoanona cuhane niicha jerei beratilha Cana Coaunerane, jiaonriha tonoraeneichene,”

naain belu Rabiri.

⁸ Nii aina sunacaaurulu- Israelitacuru turuaalu Josoe ne jaan jelai que, aitohalu Cana Coaunerane jana nihane, coatilha leeocho janonaa berihei Cana Coaunera, rai nebetacana jaun nihacachene que aitiin. ⁹ Nitohanihane jaunte, satiin Cana Coaunera cachaneen nenacaauru rai, ne jelai tein acaauru que banijiaain

nebetacaauruna jaanu. ¹⁰ Charijieen teeinti itolere coaunaane nainaan nebetacaelu Cana Coaunera, nii rijijieen techu, rai namihaneoo caje nebetacaa aicheen, nii Cana Coaunera nebetacanjau turuhin nei. ¹¹ Aihane jaun, nii nere tonoraelanaala nenacaauru rijijieen nena coataa, atiin caaintati ichacaachene coina cana letoaane nihanatiin nere tonoraacache-nete ne, nii rai nebetacanjau turunaa nainichaachene coina.

¹² Nii cana rai Cana Coaunera beratenojoi Erenaate, cana ichao coreen, cana rai leeocho ichaonaa teraneen, naajoaineen nena ne. Acate aiha soondarooru rai saberejerane ajinaain nenaane amurijiriin nihane jaun, cana suujua cuhane enohin cana suujuene maajeein coitucue. Nii jaunte cana suujua cuhane canaacha coacui, canaacha ichana jerei, naaonjoainuri baasoneen, caohachaneen, naaonjoaane coitucue raotojoeen. ¹³ Nitohanihane jaun, nihei chuni Cana Coaunera coaunano-joineen nena, que nasiha nainera. Acate inae ecu tihane bana rai canaacha beenei coitucue.

Saseredotecuru curuaanaa Curuaanaa Jesoso

¹⁴ Cana Coaunera Calaochi Jesosote, acaihaniji cana rai saseredotecuru curuaanaacuru Curuaanaa neen dedeeu cuelu. Aihane jaun, leinjiin acaacha esenetaain cohajihacachene rijijieen, itolere bana jianena coacuelanaala beebejeen, acaacha cohajihacachenete caohachae. ¹⁵ Acate cana rai saseredotecuru curuaanaacuru Curuaanaa nihane jaun, coujunojoinichaachene enaacha osa que nesaruna nainichaachene coitucue; acaentonai aihacachene rijijieen coujunojoineen nerejeto-

lune jaun. Nete laen, nii saijieein chabana osa que nesaruenu. ¹⁶Aihane jaun, chaque tonajelanaala, atiin cana belaicha Cana Coaunera rori- *trono* rohan netichaachenete ne; cairichaa-joaain cana coaraain, latichaachene naineein cana rai caohacha ichaain cana coroatajanena nainihane coina.

5 ¹Satiin saseredotecuru curuaanaa-
curu curuaanaate, cachaauru jana janijiin, Cana Coauneraacha teineein ne, aca cachaauru osa coreniha, Cana Coaunera rai itolere teein, inihocuru mocoeranu *sacrificios* que nihane coina. ²Nii jaunte acaentonai joenreein cacha rijjijieein nihane jaun, cairichaa-joaain- cha coitucuelanaala nenacaauru, nitajeraí nenacaauru, naonjoainuri coarae. ³Nitohaneein joaenreein cacha rijjijieein nihane jaunte, rai nosa, cachaauru osa, naonjoain coreniha, Cana Coaunera rai itolere lenonecuru *sacrificios* sohin moco. ⁴Niheí chuni raajenihane jerihane rijjijieein, saseredote neein cocoinanohineein nei. Aaroon janijiin raain cocoinaalune rijjijieein, raain cocoinaa Cana Coaunerane banaachate laen saseredote neein nena naine cacha. ⁵Nii rijjijieein chu coatíha raajenihane saseredote neein nihane coina, cocoinanohineein niheilú Jesoso, Cana Coauneraate cocoinaain nelu. Acate rai:

“Iite canu calaohineein,
enene canuhacha teineein
nei,”

naelu. ⁶Chaen techu, rai Quiricha Inoaensi cuhane:

“Iite chabana satonoelanaala
saseredote neein neriquiin,
aihalu Melquisedee ne
rijjijieeincha,”

naain ne laenanohineein.

⁷Jaiti cana rai chauratane que ichaohane bana, atinaaururichaaaine cajé

ichoteratiha Cana Coaunerane coina, jataain chanaain, cajé bajaa Jesocurisitone janate, jataain nere tonoraeranihane jaun, coroatajanelu nii cairichaaaururichaaaine abaantana nainihane coina rai Inaca Cana Coaunera. ⁸Nitohaneente Cana Coaunera Calahinihane saijieein, necairichaaanaa coaraain nelu Jesocurisito, jeriha rai Inaca Cana Coaunerane rijjijieein nenaá jerenacaau. ⁹Nitohaneein jataain Inaca ere tonoraeraneein nihane jaunte, Aca, satiin nere tonoraain neinichaachene ichoterateraneein ne. ¹⁰Nii jaunte Melquisedee rijjijieein nenaá saseredote neein cocoinaelu Cana Coaunera.

Jataainte elunae esenetaain nihancane jianichaane.

¹¹Niha jataain arajiin inara rai irihanune jaanu niqui. Nete jataain caaintate inara rai bihanune, cha aonaquichene nihanatiin coitucusinee-
chene jaun. ¹²Inae niqui carajaa, inara cacha relaeraneein neeichene jaanu rijjijieein Jesocurisito coitucuhin neeichene. Nete enanetojoein caainta-
jelanaala cana relaa Cana Coaunerane jaan que nihanatiin nacoauneein inara relaera jerequiche. Nii jaunte aihá leinjiin canaanai ujuarine rijjijieein neeichene jaun, iniho quinaa nainenihane jaun, itariicha cohajiha canaanai ujuarine rijjijieein jataain caaintaelanaala nenaá que inara relaera jerequiche. ¹³Nii itari coha canaanai ujuarine rijjijieein, caaintajelanaala relaera jereraaurute, leinjiin canaanai rijjijieein neein niicha ichai coitucuela-
naala ichoae. ¹⁴Nete laen nii iniho que cuaain inara relaanune jaan Cana Coaunera Ere neein nenaá ne. Acate, inae acaauruhacha coacui coitucuhin, “Naaonjoainte baaso ne,” jana, “Naaon-

joainte caohacha ne,” naain coitucuhin nenacaauru rai benojoi ne.

6 ¹Aihane jaun, inae caohatiin jauriaanejeein Jesocurisito que nerelacaachelune jaun, inae leeochangeein coacuelanaala, ainaacha iicha cana suujuane reentiaain sacuhacachene ne.

Inae nainihe nacoauneein jauriaanejeein esenetaacachene nunuhetihacachelune rijijieein neein, baaso ichaquichene coreniha cana nitaje rai nihacachelune rijijieein nena nainihaacache. ²⁻³Raujiaain Cana Coaunera esenetaain, cachaauru baotisaain, biji que Jesocurisito esenetaeraauru dadaain acaauru rai Cana Coaunera bajaain, o caje ichanaain neeurichaain onacaaurune, nerichaain chabana satonoelanaala casetecone, naonjoainuri coitucuhacache caohatiine jaun, jianein nena coacuelanaala que leeochoauru relaacachenete ne. Jeriha Cana Coauneranete nitohanein icharichaachein.

⁴Nitohanihane jaun, inae le sajeein itolere coaraain coitucuhin, Cana Coaunera Suujue siriin, ⁵jataain caohatoha cana rai Cana Coaunera beratenojone coitucuhin, itolere que jataain nelateineein nerichaain caa baiha neeni janonaa quene coitucuhin, ⁶naonjoaain neeichene saijieein jianequichene, inae nacoauneein jeriha Cana Coaunerane rijijieein ichaonaa naineriheicheein, coroso que Jesocurisito tein, nocoeje chanuuruhalune tochanein rai nocoeje chanuha airiquicheeine jaun. ⁷Nete laen atane caohacha que temule jaera rai, atane setejiaa elone caohatiin omarohin inacaain nihane rijijieein, jeriha Cana Coaunerane rijijieein neeichene, inara rai caohacha ichaain inara corootajaneerein Cana Coaunera. ⁸Jana nii temule

jaera rai oja aina omane neeojoaain niha nii temulene rijijieein neeichenete, laen inara cojiotaain inara mocoerateerein Cana Coaunera.

Canaacha cohajeite leinjiin acaacha cohajihacachene icharanein ne.

⁹Nete, inara rai caritiin aitocooaunne rijijieein, inara inae jeriha Cana Coaunerane rijijieein ichaohin iiquichene caina, nichoterichaacheeine esenetaichene caje cuaain leeochangeein coacuelanaala neeichera canejeraauru. ¹⁰Nii jaunte, chabana baaso ichaeni hane jaun, nii enanetojoein ichaquichene rijijieein, leeochoauru cana nejeraauru- canaacha esenetai esenetaeraauru belaiquichene coarateein, corootajanequichelune baitenereein Cana Coaunera. ¹¹Nete laen, jataain ainaacha iiquichene reentiaain, acaacha cohajein, esinae rauhijiriin corajein ichaquichene coarateein, inaraacha ichai ichaquichene caohachae. ¹²Coatiha chaque nelatihei chachaain neeichene coiinteein ichaquichene. Charijieein teeinti itolere bana jianelanaala esenetaain neeuruhane jaun acaauru rai tihane caina Cana Coaunera aitoonjoa raeranein neure esenetaeraauru, nii rijijieein neeuche inara netonai.

¹³Abaraun rai niicha teeni tihane caina aitoahalune banate, leinjiin Acaacha itolere amurijiriin nihane jaun, inae neniha amurijiriin neine jaun, aca Cana Coaunera neein coarajein icharichaaine caina: ¹⁴“Canune ii corootajanein, arajiin janiinacajelanaala nefaauruha iicha foerateeurine caina ichareeunicha,” naain Abaraun rai biha Cana Coaunerane jaun, ¹⁵luhecaelanaala carajaain cojoaain, nii rai tihane caina Cana Coaunera aitoonjoa raelu Abaraun. ¹⁶Nete laen

cachaauru cha chana jerecuruhane, “Cana Coaunera coarajihane jana icharihanine que,” aitiin ichae. Nii jaunte, cha chana jereein nihane esinae rauhijiriin icharihanine esenetaera coina, “Cana Coaunera notaracaae icharihanine coina,” aitothane, inae nene nenacaen rohecaera. ¹⁷Nii rijijieein techu, nii niicha teeni raeraneein neenihuri rai, aansijiinniji nii aitothane corelanaala, esinae rauhijiriin icharichaaaine coitucuuruhane coina, aca Cana Coauneraneein coarajeein icharihanine que aitelu Cana Coaunera. ¹⁸Cana coritaelanaala niicha teeni naitoonjoan, aca- Cana Coauneraneein coarajeein icharihanine coina, Cana Coaunera aitoonjoante raacache, Aca itolere baaso caje cana beraichaneein nihane coina, naitoonjoaacha cohajeein nihacachene jaun. ¹⁹Nii cana rai niicha teeni- canaacha cohajeite, nitajihane coataa cana suujue nunaeranein ne. Charijieein teeinti, cujuana nichajai que auriteein bote nunae rai nunaera- ancla, nalaa fichafichaanaane coataa nii rijijieein. Nii canaacha cohajeite chabana turunaa nainenihacache Teenforo cuhanai bujuaneein nena ne jaun- cana turuhaeranu que nenaanein ne. ²⁰Nitohaneein ecu cana turuaeranu quete cana rai chabana satonoelanaala nena saseredoteneein nelu Jesoso, aihalu Melquisedee ne rijijieein.

Saseredote inoansi- Melquisedee rijijieeinte nelu Jesoso.

7 ¹Nii Melquisedee jetaote- Cana Coaunera rai saseredote neein, Saleen batane curuaanaa neein nelu. Nii Melquisedee jetao techu, leeochoaauru curuaanaacuru reychuru cachaauru amuritiin sohin jitariin acaauruhacha sirii ruluha acaauru cajene baiha

caaujiha Abaraaunne jana, que tacaain cuhin, coroatajaniha Cana Coaunerane aina leeochoaauru amuritohane que aitiin cojiotaain coroajelu. ²Nitohaneein coroaecane jaun jetaote, nii leeochoaauru amuritiin sohin acaauru caje niicha ruluhi lechooncanu telu rai Abaraaun. “Melquisedee” naane jetaote: “Caohacha ichara curuaanaa” naane aite. Jerichanejeein jetao techu: “Saleen” naane: “Raotojoein nena” naa aite. Nii jaun jetaote, nii Saleen batane curuaanaa nihane jaun: “Raotojoein nihacachene tera curuaanaa” naaure Melquisedee que. ³Nihei coitucueraai rai inaca, rai neba, foerate-racuru, naaonjoainuri. Niheichu coitucueraai nejanoa, ohin, naaonjoaane. Nii jaunte, acaihaniji chabana satonoelanaala nena Cana Coaunera rai saseredoteneein ne, aihalu Cana Coaunera Calaochine rijijieein.

⁴Coaracuche nachuhinti jataain nelateineein niha nii Melquisedee ne jaun, nii leeochoaauru curuaanaacuru cachaauru sohin, niicha rului lechooncanu tihalu rai, cana foeratera inoansi Abaraaunne. ⁵Moisesa tenojoi rauhite niqui, Lebi nefoerateneein nenacaauruhacha- saseredote neein leinjiin acaauruhacha, satiin cachaauruhacha sirii lechooncanu raauruhane coina aitelu, satiin cachaauru, acaauru araanein- acaauru rijijieein Abaraaun nefoerate neuruha acaauru netonoaine saijieein. ⁶Nii Melquisedee coatiha laen niqui, Lebi inamoco nihei. Nete nii saijieein, nii Cana Coaunera aitoonjoa raeraneein niha Abaraaun natiin, caje nii niicha rului lechooncanu bajaain Abaraaun cojiotaain coroaje. ⁷Nii coitucuhacachene rijijieeinte, nii cojiotaain niicha coroajei cacha amurijiriin nelateineein ne, nii cojiotaera. ⁸Satiin caa chauratane que cachaauru

caje acaauruhacha sirii lechooncan raaurerate ooruhane rai neein aihure. Nete laen nii Cana Coaunera Quiricha cuhane, Melquisedee que naitoonjoa enanetojoein jaiti ichaonaa que aitona rijitjojoein aite. ⁹Nii rai niicha rului tiha Abaraaunne cajete, nii Lebi inamoconeein nenacaauru- saseredotecuru, enene cachaauru caje acaauruhacha sirii lechooncanu bajaain raeraneein neenihuru netonai, Melquisedee rai niicha sirii teeuruhalone coitucuhacache. ¹⁰Nii que taca cuha Melquisedeene jana, rai jaberoco cuhane jaiti najanoelanaala neeuruha niicha foerateenihurune jana, rai niicha rului tihalu Abaraaunne jaunte, jaiti nejanoelanaala netiin acaauru netonai acaauruhacha sirii lechooncanu teein neurelu.

¹¹Nii coitucuhichene rijijieinte, Aaroon foeratenojoein nenea- Lebi inamocooru- saseredote neein nenacaauru aina cuaain, Israelitacuru rai rauhi teein nelu Cana Coaunera niqiu. Nete nii rauhi tonoraeraauru, esinae rauhijiriin jeriha Cana Coaunerane rijijiein neeurenelu. Nii jaunte nacoaaunein saseredote letoaelu Cana Coaunera. Nete laen, nii niicha letoai Aaroon nefoerate caje nenaanelanaala nihalu Melquisedeene rijijiein nenaane. ¹²Nii jaunte, nitohanein necoriha saseredotene jaun, Cana Coaunera rai rauhi netonai necore. ¹³Nii ena nenea cana rai saseredotecana Curuaanaate, leocha Israelitacuru lauri caje nenea nihane que aitiin laenanohineein ne Cana Coaunera Quiricha cuhane. ¹⁴Nii jaunte, nii coitucuhacachene rijijiein, Jodaa lauri caje nenaanein nelu cana Curuaanaa. Jana Moisesa coatiha nii Jodaa lauri caje nerichaa in saseredotene coina coacuhin iriheilu, neeururichaa in saseredotecurune bihane bana.

¹⁵Nii jaunte, jataain caohati saseredote Melquisedee rijijiein niha,

nii ena nenea cana Curuaanaa- saseredotene coitucuhacache. ¹⁶Aihane jaun, coatiha aihuruha leeochoaurune rijijiein, “Acate rai laurinein ne,” naain rauhi cuhane laenanohineein nihei. Acate chabana nitajenaachara ichaonaa caje unaanein ne. ¹⁷Nii jaunte, nii rai:

“Iite Melquisedee rijijiein chabana satonoelanaala saseredote neein neriquiinha,”

naa Cana Coaunerane, ne laenanohineein Quiricha Inoaensi cuhane.

¹⁸⁻¹⁹Nitohaneinte nii jauriaanejein nenea rauhi, Moisesa rai rauhi, naaonjoain aina chaque nelatenihane jaun, jeriha Cana Coaunerane rijijiein cachaauru ichao rucuhena nainenihane jaun, itajein nacoaunein jataain amurijiriin nelateinein nenea te Cana Coaunera. Acate laen Cana Coaunera rene cana turuaeranein ne.

²⁰Chaen techu, aca Cana Coaunera neein coarajein chabana satonoelanaala nihane coina, cocoinarihanene esenetaacachene coina raajenihane aitelu. Jana leeochoauru saseredotecuru, coatiha chabana satonoelanaala neeuruhane coina, aca Cana Coaunera neein coarajein cocoinaane coina aitohi Cana Coaunera. ²¹Nete laen cana Curuaanaa, chabana satonoelanaala nihane coina, aca raajenihane coarajein cocoinaane que:

“Canune

Cana Coaunera neein caraajenihane coarajein icharihanuhine coina aitoon.

Nii jaun

nii caitoonjoan corerihaaunni.

Iite chabana satonoelanaala saseredote neein neriquiin,”

naain ne laenanohineein rai Quiricha Inoaensi cuhane.

²²Nitohaneeinte nii jauriaanejeein nenea amuritoheriin nenea, cana rai Cana Coauneraacha teeni terateraneein nenaane Jesoso. ²³Leeochaauru jauriaanejeein saseredote neein nenacaaurute, cana rijijieein cachaneein neeuruhane jaun, arajiin neeurelu, ohin nii baiha ichanana nainecurenihane jaun. ²⁴Nete laen Jesoso ohin nitajenaa nainenihane jaun, leinjiin acaacha chabana satonoelanaala cana rai saseredotenein ne.

²⁵Nii jaunte, aina cuaain Cana Coaunera coacuhin ichaonacaauru ichoteratereein chabana satonoelanaala nihane rijijieein, acaauru netonai chabana satonoelanaala Cana Coaunera aina neeuruhane caina. Nitohanihane jaunte, chabana ohenihane jaun, itolere bana satiin esenetaeraauru coreniha bajaee bajaareein Cana Coaunera caje.

²⁶Nitohaneeinte esinae rauhijiriin canaacha latei saseredotecuru curuaanauru Curuaanaa neein letono neein ne Jesoso. Acate Saantoneein baaso colane- niheichu osaquelanaala-osaonacaauru caje, jelai dedeeu tenojoineein ne. ²⁷Coatiha leeochoauru saseredotecuru rijijieein, jauriaanejeein rai nosa coreniha, nii baiha cachaauru osa coreniha, naonjoaain inihocohin Cana Coaunera rai tihane caina nenea nihei. Nitohanelanaalate, le sajeein chabana coaiteen ohenihane caina, raajenihane cana coreniha rai jaberoco telu sohin atinaauruhane caina. ²⁸Jana nii Moisesa rai rauhi que cocainanohineein nenacaauru saseredotecurute- nechu joareein cachaneein osaonanein neeurelu. Nete laen, nii Moisesa rai rauhi que cocainanohichuru baiha, ena nenea saseredote cocainane caina, aca Cana Coaunera neein coarajeein icharihanine que aitoahlune jaan, rai Calahineein osaquelanaala- chabana satonoelanaala

saseredote neein nihane caina cocoinaelu Cana Coaunera.

Ena nenea- cana rai, Cana Coauneraacha teeni terateraneein niha Jesoso ne.

8 ¹Nii cana rai saseredote curuaanaa- curu Curuaanaa- caa inara rai ereereecaaunne jaante- jataain itolere amurijiriin nelateineein Cana Coaunera rijijieein nihane jaun, Cana Coaunera nelaurihanaja raotono nichajai que nelauriaelu Cana Coaunera rohan.

²Acate cana rai esinae rauhijiriin saseredote esine neein Cana Coaunera ichanohineein nenea- *santuario* cuhane neein, Cana Coaunera rene cacha turuaeranein ne. Coatiha aihuruha leeochoauru saseredotecurune rijijieein, raajenihane cacha ichanohineein nenea- *santuario* cuhane nihei. ³Satiin saseredotecuru Cana Coaunera rai chaaelai teraneein, inihocuru mocohin teranihane caina cocainanohi nihane jaunte, Jesocurisito netonai nii rijijieein cana osa coreniha raajenihane netelu atinaauruhane caina. ⁴Coatiha caa chauratane caje nenea nihane,

saseredote nenea nainerihe. Inae caa chauratane que arajiin neeuruha saseredotecuru, Moisesa rai rauhi cuhane aitothane rijijieein niqiu, Cana Coaunera rai nii Teenforo asaee lenonecuru sohin mocooruhane caina. ⁵Nii saseredotecurute, nechu dedeeu ichacuruhane cojunacanein nitohanei icharanein neeurelu. Canate esinae rauhijiriin, nechu dedeeu nenacaauru rijijieei icharanein ichacuruhane coitucuhacache, *santuario* ichaa Moisesane caina rai: “Aonaaun. Nii ichei ichatane ucuunno coaratihanulune rijijieein ichaaura,” naalu rai Cana Coaunerane caje. ⁶Nete cana rai saseredote laen, jataain nii leeochoauru amurijiriin, jataain cana rai caohacha

ichaain, cana rai tihane coina aitohalu
Cana Coaunerane rijijieein, Cana
Coaunera rene cana turuaeraneein ne.

⁷Bana caohachaain cachaauru ichao
rucuhena nainiha, nii jauriaanejeein
nena Cana Coauneraacha teine,
coatiha neriheilu Jesocurisito caa ena
niicha tei ichaane coina.

⁸Nete nii jauriaanejeein niicha tei
rijijieein neureniha cachaaurune jaun:

“Inae cojoanona que turuhane
banane,
Israeli, Jodaa, naaonjoainuri aina,
enachasine canuhacha ichaneni
ichareeunnicha.

⁹Nii ena acaauru aina
canuhacha ichanenu,
coatiha
Egipto batane caje
acaauru foerateracuru
rocohanulune coina,
canuhacha ichailu rijiirinaai.

Nene,
nii acaauru aina
canuhacha ichanenu
tonoraelanaala
ichaaoruhane jaun,
acaauru que jaolecoonlu.

¹⁰Nii caa baiha Israeli aina
canuhacha ichanenu,
acaauru suujua cuhane
laenanohineein niha
Canu rai rauhine,
suujua caje coaaneein
coitucuuruhane coina
canuhacha ichanenu ne,
Canu,
acaauru Coauneraneein
nihanune coitucuhin,
canu cachaneein neeuruhane coina.

¹¹Nii bana,
inae le cachaauru,
leechoaauru,
acaauru laurichuru,
acaauru araichuru,

naaonjoainuri,
inae Canu que
ita relaauruhane latelanaalate,
Canu,
acaauru Coaunera nichaaunne
coitucuurureein
satiin ichauhenaauru,
canaanaihunru,
naaonjoainuri.

¹²Nii banane
baaso ichacuruhane que casuujua
acateein,
acaauru osa que canu suujua
acatereeeunni,”

naelu Cana Coaunera.

¹³Nii cana rai nacoaneein enachasine
niicha ichanenu biha Cana Coaunera-
nete, inae chaque nelatelanaala nitaje
rai niha nii jaurihaanejeein niicha
ichanenu coitucueratiha aite.

*Santuario chauratane que nenaalu aina
dedeeu nena santuario.*

9¹Nii jauriaanejeein Cana
Coauneraacha teite, caa chauratane
que rene nichuuntaauruhane jaanu que
santuario neein telu Cana Coaunera.
²Nitohaneente, nii jauriaanejeein
santuario neleru asaae jetao nelu leinjiin
usi nujua, leinjiin mesa Cana Coaunera que
banijiaain nena faan siriin, naaonjoain.
³Jana, que jauriin nena bujua cuhane
jetaote, jelai teein Cana Coaunera
turunajaneein curujaelu. ⁴Nii cuhane
jetaote, nelu oro caje ichanohineein nena
rori, jujui- incienso mocooruhane jaanu
que, chaen camela itolereneein oro que
carihanojoneein nena. Nii camela cuhane
jetaote nelu, oro caje ichanohineein nena-
leinjiin baichaje, cuhane manaa neein
curujaaain nena quinacai- manaa siriin.
Chaen jetao techu, nii camela cuhane nelu
Aaroon bastoon omaronalu, Cana
Coaunera rai rauhi- ajeri caje nena tabara
que teein laenanohineein nena,

naonjoainuri. ⁵Nii camela ichoae jetaote nelu- coroatajai cacha rijiinanai itaroojia-naain. Acaauru jetaote, ecu niha Cana Coaunerane beraneein jetao, nii nitaro que nii camela fuera asaaraneein ne. Nete ena nelatene jitariin nii coitucuerateein niique irihacane. ⁶Inae nitohaneein satein ichanohineein nihane jana jetaote, itolere bana nii nunuheneein nenea- Cana Coaunera rene nichuuntaauruna jaau turuure saseredotecuru, ecu Cana Coaunera rene nichuuntaain ereereecuruhane coina. ⁷Nejetaote nii que jauriin nenea- jelai teein Cana Coaunera turunaja neein nenaau jetao, saseredote curuaanaa- curuhacha ecu turue le sajeein le jaanacaauru nainein. Ecu enohane nainein jetaote, lenonecuru coichana amaaure, jauriaanejeein rai nosa coreniha teein, nii baiha coitucuelanaala neosateeruha cachaaurune coreniha tihane coina. ⁸Niite cana que coitucuerate Cana Coaunera Suujue, nii nunuheneein nenea- Cana Coaunera rene nichuuntanaanaja neein nihane jaun, jaiti neniha nii jelai teein Cana Coaunera turunajaau cana turuaerane jaau, ecu turunaa nainenihacachene que. ⁹Satein niite, nechu cau jaiti ichaohacachene tonohanau cana que coitucuerateranu que nelu. Nii itolere inihocuru mocohin Cana Coaunera belaihuruhane jaan, coatiha nitohanei ichaain coroaeraauru cachaauru suujua couluoona nainiheilu. ¹⁰Acate raujiaain lenonecuru, conacaihuru, naonjoainuri couluoranein, cachaauru netonai chatoanai ichacuruhane, rai jaberoco caje niicha ichai jaauruhane coarateeuruhane jaanu que nelatelu, cana suujue coriha Cana Coaunerane que turuhane reentiaa- jeein.

¹¹Nete laen inae turuhelu Jesocurisito. Acate enene inae cana rai saseredotecuru curuaanaa Curuaanaa esineneein- chabana satonohelanaala nereein. Nii

saseredote neein niicha ichai ichaane jaan- *santuariote*, esinae rauhijiriin nesineneein nenea ne. Coatiha raajenihane cacha chanohineein nenea nihei, niheichu cau chauratane que nihei. ¹²Nitohaneainte *santuario* cuhane enohelu Jesocurisito, coatiha aihuruha caa chauratane que nenacaauru saseredotecurune rijijieein, Cana Coaunera rai, cabara curuanaa, toro narejeen, naonjoainuri coichana tihane coina nihei. Acate raajenihane rai coichana tihane coina, le sajeein enohelu chabana coaitenihane coina. Nitohaneainte cana rai ichaonaa chabana satonolanaala nenea teraneein nihane jaanu raelu. ¹³Esinaete niqui, nii toro narejeen coichana, cabara curuaanaa coichana, baca narejeen moco bajane, naonjoainunri que, chaaelai Cana Coaunera que banijiaelanaala nenea cabuuruhane couluorejete- lu, Cana Coaunera que banijiaaenein nihane coina. Nete laen cacha suujue couluoona nainenelu nii ichanacuru. ¹⁴Nete laen jataain nii amuritoheriin nelateineein ne Jesocurisito coichana, aca Cana Coaunera Suujue, chabana nitajenaacharanejeein nenea aina cuaain, raajenihane Cana Coaunera rai cana coreniha ohane coina netihalune jaun. Nitohaneainte cana suujua letononeein, canaacha ichai coreniha, cana nitaje rai nenea caje, cana suujua corein nelu nii rai coichana- osa colane nenea- Cana Coaunera jerei ichaain nihacachene coina.

¹⁵Nii cointate ohelu Jesocurisito, ena nenea Cana Coauneraacha ichaneni aina cuaain, ichoachaniha neein onacaaurulu, ena neinichaachene, naonjoaini- chaachene Cana Coaunera aina cana tihane, nii inoaenlu jauriaanejeein niicha ichai, raujiaain cachaauru osa bujuateranein nihane caje, acaauru osa

que suujua acatena nainiha Cana Coaunerane, sатиin niicha ranojoneein nenacaauru netonai nii naitoonjoa niicha teeni chabana satonohelanaala nenea ichaonaa raeraneein neeuruhane coina. ¹⁶Oha cachane baiha, rai rucuhele niicha cocoirichai raauruhane coinete, jauriaanejeein oha nii cachane coitucuuruhane rai ne. ¹⁷Nii jaun, jaiti oheniha nii rucuhele erora cachane, coatiha nii niicha cocoirichai rucuhele ranaa nainihe cache. Inae ohane baihate laen naine nii rucuhele raa nii banihatihane jaan ne. ¹⁸Nitohanihane jaunte, nii jauriaanejeein nenea Cana Coaunera ichai tonoracuruhane coina, carenero sohin rai coichana chororejetucurelu. ¹⁹Jerichanejeein jetao techu, aina nenacaauru cachaauru rai jetao, nii Cana Coaunera aitoonjoa rauhi bihane baiha jetao, carenero ujui caje, lana caje ichanohi cajione lanajai aina, leinjiin enuha- isopo uune raain jetao, toro narejeencuru, cabara curuaanaa, naaonjoainuri coichana acau que jasiitenohineein nenea que setejaain jetao, Cana Coaunera tenojoi rauhi laenanohineein nenea ichoae rijaain cachaauru ichoae netonai rijaie Moisesa. ²⁰Nitohaneein acaauru ichoae rijaain jetaote: “Caate nelaterichain nii cana rai tonoraacachene coina Cana Coaunera tenojone coitucuhichene coina, coitucuerateraneein nenea Cana Coaunera icharatenohi ichananera,” nae jetao Moisesa. ²¹Chaen jetao techu, loanari *santuario* aina, nasaae enohane saseredote rai nelatenei corujueleuru, naaonjoainuri ichoae rijaie Moisesa. ²²Nitohaneinte, sатиin itolere coichana que rujuaain, jelai teein culuoono-joineeин nihane coina aitelu nii rauhi. Nii jaun, neniha coichana joera cana corenihane, nerihe cana osa que suujua acatiha Cana Coaunerane jaanu.

²³Nitohaneinte carenerocuru sohin rai coichana que, nii dedeeu nenacaauru cojunaca neein nenea couluoocurelu. Nete laen, jataain nii amuritoheriin couluoora latelu nii dedeeu esineneein nenea.

**Cana osa caje cana rocoeranu
quete ohelu Jesocurisito.**

²⁴Coatiha nii Cana Coaunera nenaja esine cojunacatiha cachaauruhacha ichai asaae enohilu Jesocurisito. Acate rauhijiriin Cana Coaunera nenaja dedeeu cuhin, Cana Coaunera rai, enene cana coreniha iriha ne. ²⁵Coatiha aihuruha saseredotecuru curuaanaa-curu, le jaanaca nainein nejelau coichana teeuruhane coina araa saain nii *santuario* enohine rijijieein, araa saain ohilu Jesocurisito. ²⁶Nitohanihane chujianra, necooaunaa cana rai chauratanene caje coauneein, ore araa saain Jesocurisitona. Nete aca satononiha ecocohin- le sajeeincha raajeniha neteein ohelu- chabana satonoelanaala cana osa caje cana rocoeranu que. ²⁷Charijieein teeinti le sajeein ooruhane caseteco coaracure cachaauru, ²⁸nii rijijieeinte le sajeein atinaain, arajii cachanichaane, osa aina nenea caje cana rocoeranu que tenojoneein nelu Jesocurisito. Inae nacoauneein tururichain niqui. Nete osaaonacaacuru ichoteratihane coina ainereein, esenetaain acaacha cohajein nenacaauru ichoteratihane coinete aicheain.

10 ¹Nii Moisesa rai rauhi, nechurajiaain nii turuha uhenenilu rijijieein nihalu nesinenelanaalane jaunte, acaauru osa caje- nii le jaanaca nainein- araa saain jeelai lenonecuru mocohin Cana Coaunera rai teeurera couluoona nainenelu. ²Bana nii acaauru osa caje acaauru couluooca nii Moisesa

rai rauhine jana nihanete, inae osa caje couluoonohineein neeuruhane coitucuhin, inihocuru mocohin teeuruha Cana Coaunera raine jianecurure.

³⁻⁴Nete nii toro narejeencuru, cabara curuaanaa, naaonjoainuri coichana, acaauru osa caje, acaauru couluoona nainenihane jaun, osaaonaneein neeuruhane coaauca, nii le jaanacaauru naanein, nii inihocuru mocohi teure Cana Coaunera rai.

⁵Nitohanihane jaunte, inae chauratane que uhane rai:

“Ii rai lenonecuru teein,
que ii belaihuruhane
jereneeine jaunte,
ii rai canu jaberoco tihanune coina
caletoaaiha.

⁶Niheichu

acaauru osa caje
couluoonaquine coina,
ii rai iniho mocohin teein,
chaelai que
ii belaihuruhane coina jeriheei.

⁷Aihane jaun, nocoaaun,

nii Quiricha cuhane
laenanohineein nihane rijijieein,
iicha jerei icharaneein
nihanune coinara
Cana Coaunera,”

naelu Jesocurisito Cana Coaunera rai.

⁸Niritiin nii acaauru osa caje couluoona-jaane coina, rai lenonecuru sohin teein, chaelai que belaihuruhane coina aitiin, rai lenonecuru mocoaruhane coina aitiin, naaonjoaan, rai naitoonjoan rauhi rijijieeine saijieein, rautaniha Cana Coaunera que rai aitohane baihate:

⁹“Nocoa inae cuhanu iicha jerei ichacaanne coina” naain aite Cana Coaunera rai. Nitohaneinte nii lenonecuruhacha sohin teeuruhane coina nena rauhi itajeein, raajenihane rai jaberoco tee, ena nena cana rai Cana Coauneraacha teineein nihane

coina. ¹⁰Nitohaneein jeriha Cana Coaunera rijijieein, le sajeein chabana coaitenihane coina, cana coreniha ohane coina, raajenihane rai jaberoco tihalu Jesocurisitone corenihate, cana osa caje cana couluocoelu Cana Coaunera.

¹¹Chabana osa caje cacha couluoona nainenihane lenonecuru sohin teeuruhane saijieinte, sатиin saserdote Jorionein nenacaauru, araai saain itolere bana lenonecuru sohin teurelu. ¹²Nete laen Jesocurisito, le sajeein, chabana coaiten ichaenihane coina, osa coreniha rai jaberoco tihane baiha, Cana Coaunera rohan nelauriaelu.

¹³Ecute ena neein, que nejeratenacaauru amuritoeratiha Cana Coaunera cojoae, ¹⁴rai jaberoco teein coreniha Cana Coaunera cachaneein neeuruha cachaaurune coina couluoocane jaun.

¹⁵⁻¹⁷Jana Cana Coaunera Suujuete:

“Inae chabananihi
acaauru rai canuhacha ichanenite;
acaauru suujua cuhane
laenanohineein niha
Canu rai rauhine,
suujua caje coaaunein coitucuu-
ruhane jaan nereein.

Nii jaun inae nenacaanein
acaauru osa aina baaso ichacu-
ruhane coaaurihaaunni,”
naain aitohalu Cana Coaunera
coitucuerate cana que.

¹⁸Aihane jaun, inae nitohanein cana osa que suujua acatiha Cana Coaunera jaun, inae nainihei nenacaen osa coreniha iniho mocohin tenaa nainihei cacha.

**Cana Coaunera rohan
nichuuntaacachenete ne.**

¹⁹Nitohanihane jaunte rai coichana jaohin ohalu Jesocurisitone coreniha, aina cuaain, inae enene nainichaache,

chaque casilanaala tonajelanaala Cana Coaunera nenaja esine *santuario* turuhacachenera canejeraauru.

²⁰Nitohaneeinte Cana Coaunera rene turunaa nainenihacachene jaan bujuateraneein nena itajeein, nii ena nena ichaonaa que turunaa nainichaachene jaanu ajiinchateraneein, rai jaberoco telu Jesocurisito. ²¹Nii jaunte Jesocurisito cana rai saseredote esine neein nihane jaun, aca Cana Coaunera nenaja acatiha cana turuaeraneein ne.

²²Aihane jaun cana suujua cuhane asinojoneein cha coacuelanaala, niheichu leecha coacuelanaala, canaacha cohajeeicha que coacuhin, esinae rauhijiriin cana suujua cuhane coitucuhachene saijieein, chachaain nihacachene jianein, Jesocurisito aina cuaain couluoonojoneein Cana Coaunera rohan turuhacachenete ne.

²³Nii jaun coujurihu Jesocurisito esenetaeranein nihacachene jaun, itolere bana esenetaacachene rijijieein nihacachenete ne. Inae ecu tihane bana, cana rai niicha teenu naitoonjoalu terichaaain Cana Coaunerane jaun.

²⁴Nitohanihane jaun ita rijijieein caohachaaain neein, itolere bana ita belaaain nihacachene coina, ita coroatajanein nihacachenete caohachae.

²⁵Aihane jaun nainihe iahuruha leeochoaurune rijijieein, ita aina netaojiaain ereerecaachene coiinteein jianena nainihaacache. Coiintelanaalate naine, inae tururichaaain Cana Curuaanaa cojoanonaa que turuelalajihane que nainaaain, jiniiquin itaque corajerateein, ita rai coitucueratihacachene caohachae.

²⁶Jana inae raotojoeein Jesocurisito coitucuhin nihacachene saijieein, naosatenaa coacuhin nihacachene inae nerinaain nacoauneein cana osa coreniha ohenu. ²⁷Nechu usi tabai jana

necairichanaa coaraain nitajeeururi-chaain Cana Coaunera coitucunaa jerelanaala que nejeratenaa rijijieein nenacaaurune que banijiaain nenaachate cohajerichacheein.

²⁸Chunocoha, Moisesa rai rauhi tonoraelanaala nihane jana, neeuruha nichatajaain coaraain beeureranete, cairichaaajoaain coaraelanaala, sohin jaaorurejetucurelu. ²⁹Tana, nii amurijiriin casetecanohiniha cuururichaaain, chaque nelatihei rijijieein Cana Coaunera Calaoihi teein, cana coreniha ohin rai coichana jaohin naaonjoaan, cana belaiha Cana Coaunera Suujuene saijieein, que jaolequiiin nenacaaurune coitucuhichene. Nii rai coichana cana coreniha ohin niicha joailute niqii, acaauru rai niicha teeni terichaaain Cana Coaunerane coitucuerateein, jelai teein Cana Coaunera cachaneein neeuruhane coina, acaauru couluoranein nenaane. ³⁰Chaen techu: "Canuna cachaauru rai caohacha icharanein coretereunni," naain "Cana Coaunerate rai cachaauru rucuhereein," naelu Cana Curuaanaa. ³¹Nii jaunte, jataain coasihacaine Cana Coaunera nere tonoraain nenihacane.

³²Nete inara, jauriaanejeein Jesocurisito esenetaaichene nunuhe-neein, itolere que laraajiiin necairichanaa abaantaachelune coaauquichene caohachae. ³³Inara tabaaurute, satiiin notaracaae teein nocoeje chanuhin bisihururejetelu. Nii jana inara tabaaurute, inara aina jiniiquiin necairichaururejetelu inara coinaderaa. ³⁴Jerichanejeein techu, cairichaaajoaain caresero cuhane nenacaauru coaraain acaauru coinaderarejetocoichelu. Chaen techu inara rucuhele ruluuruha inara cajene nihanatiin, raotojoeein rachoojoein nerejetocoichelu cochunaelanaala. Inae nii amurijiriin chabana nitajenaa nainelanaala dedeeu niha

inaraacha raenine coitucuhichene jaun.
³⁵Aihane jaun, jiaonriha nitohaneein rariquicheeine esenetaain ichaohichene jianiquichene. Acate inara rai jeelai amuritoheriin cainareein. ³⁶Nii jaunte, jataain jeelai amuritoheriin necairichanaa abaantaain nenea nainequichene jaanu que, itolere que laraajiin neeichene jaanu latequiche. Cana Coaunera jerei ichajejin ichaohichene, tihane caina naitoonjoa raeraneein neeichene caina. ³⁷Nitohanihane cointate:

“Inae ena caeenejelanaalate turureein nii turuha uheni. Coatihana inae carajarihaain.

³⁸Canu cachaneein, canuhacha esenetaain ichaonacaaurute, chabana nitajeureneerein. Nena laen canu cachaneein nihane jianein, jauriaa ichaohalune rijijieein ichoai que nejeratereunni,”
 naalu Cana Coaunerane, ne laenanohineein rai Quirichana inoansicuhane. ³⁹Jana cana, coatihana nii rai cachaneein neeuruhane jianein, jauriaa ichaoruhane rijijieein ichaonacaauru caseteco coaracuruhane rai nenacaauru nihaacache. Canate esenetaain ichaauruhane jaun, ichoteratenojineein neeurichaaaine rai nenacaauru rijijieein nihaacache.

Cana Coaunera esenetaain niha cachane

11 ¹Esinae rauhijiriin Cana Coaunera esenetaacanete, chabana canaacha coaraai terichaaain cana raine cohajejin ichaohaca. ²Cana foerateracurute rauhijiaain esenetaauruhane jaun, cacha caohacha rijijieein acaauru coarae Cana Coaunera.

³Cana Coaunera esenetaacachene jaunte, nereecha que chauratane coaunalune coitucuhacache. Nii jaunte,

chabana cachaacha coaraai caje coaunanojineein nene, caa enene canaacha coaraai.

⁴Cana Coaunera esenetaane jaun techu, nii rai nihana Caain amurijiriin, jataain caohacha nejesina mocohin que Cana Coaunera belaiha Abeline jaun, caohacha icharaneein raain nii rai niicha tei raelu Cana Coaunera. Nii jaunte, inae ohalune saijieein enanetojoein Abeli coaaucaache, Cana Coaunera esenetaeraneein nihane coitucueratiha cana quene jaun.

⁵Cana Coaunera esenetaane jaun techu, nabana ohane coataa jaberoconeein Enoco raa Cana Coaunerane jaun, inae nii baiha coarihurenelu. Cana Coaunera Quirichana inoansicuhanete, jaiti raeniha Cana Coaunerane ajiniha, jeriha Cana Coaunerane rijijieein ichaohalu Enocone que aite. ⁶Nete esenetaenihane Cana Coauneraacha jerei ichajejin ichaonaa nainene chunichaca. Cana Coaunera aina nenea jerichaanete, niha Cana Coaunerane esenetaain, aina nenea jerenacaauru, niicha jerei ichajejin ichaonacaauru cainaeraneein niha Cana Coaunerane esenetae esenetaera.

⁷Cana Coaunera esenetaane jaun techu, inae chabana acaauruhacha coaraai icharichaaaine been suujuatiha Cana Coaunerane tonoraain, leinjiin bote tabai jaelu Nohe, cuhane rai comasai aina saain rai bereecuru aina nichotihane caina. Nitohaneein esenetaane jaun techu, nii esenetaelanaala chauratane que satiin nenacaauru cachaauru caseteco coaracuruhane jana, esenetaain nenacaauru ichoteratenojineein neeuruhane rijijieein ichoteratenojineein nelu Nohe.

⁸Nii rijijieein techu, Abaraun netonai Cana Coaunera esenetaane jaun, cotihacane tonoraain rai natane ratiriin,

nii cunaja jelai coitucuelanaala cuhin, esenetaeraneein nihane cainaeraneein, rai Cana Coaunera teenu atane que ichaoha cuelu. ⁹Nitohaneein Cana Coaunera esenetaane jaunte, nii rai Cana Coaunera teenu atane que leeocho atane caje unaaneein ichoaelu Abaraaun. Ecu jetaote, neloheritela-naala raujiaain loanariicha asaae ichoaelu, aihuruhalu nii rai, Cana Coauneraacha tei raeraneein neeninunru Isaca, Jacobo, naaonjoainurine rijijieein. ¹⁰Cana Coauneracha ichai- chabana nitajenaachara nese que ichaonaa jerihane jaunte, leeocho neseu cuhin ichoaelanaala loanariicha asaae ichoaelu Abaraaun.

¹¹Cana Coaunera esenetaane jaun techu, inae camotojoe nihane jaun canaanai sirina naineniha Sarane jana, inae Abaraaun netonai biinaa nihane saijieein, rai naitoonjoan icharihani nohanelanaalane esenetaane jaun, lararajiaa Cana Coaunerane aina nelararajiaain canaanai sirilu Abaraaun. ¹²Nitohaneinte, inae jataain biinaa nihane saijieein, janiinacajelanaala cucuana cuhane nena carene catu aina arasijie jeoneein, cachaauru foerateranein nelu Abaraaun.

¹³Satiin nii cachaurute ohelu, jaiti nii acaauru rai tihane coina Cana Coaunera aitoonjoa jitaain raelanaala. Nete jataain Cana Coaunera esenetaauruhane jaun, nota que coara rijijieein coitucuuruhane jaun, nechu leeocho atane caje unaaneein, caa cana rai chauratane que ichaauruhane coitucuru.

¹⁴Nitohaneein ichaauruhane coitucuhacachene cajete, jaiti caa chauratane que, nii acaauru rai Cana Coauneraacha teenu chabana satonoelanaala acaauru ichaonajaanu atane raarenihalune coitucuhacache. ¹⁵Bana

nii jeelai nataneecha que coaauruhane jana nihanete, jelaiha caaururelu. ¹⁶Nete nii acaauru rai Cana Coaunera teenu atane raauruhane coina, jelaiha caunaa nainecurenelu. Nii atane acaauruhacha raaenute dedeeu nenaane. Nii jaunte, nitohaneein acaauru que leinjiin nese banihateein rucuhacane jaun, acaauru Coauneraneein nihane coejene Cana Coaunera.

¹⁷Nitohaneein Cana Coaunera esenetaane jaun techu, esenetaane cojuha rai calaohi Isaca sohin mocohane coina, rai aitoa Cana Coaunerane jana, Isaca sohin mocoha nejerelu Abaraaun. ¹⁸Nitohaneinte: "Ii calaohi Isaca cajete nefoerateeurureein iicha foerateeuricha" naa rai Cana Coaunera natiin, acaihaniji rai calaohiniha Isaca ne saijieein rai sohin mocoha Abaraaun ne jere Cana Coaunera. ¹⁹Ohane caje, cacha ichtatena nainiha Cana Coaunerane esenetaane jaunte, nii rai calaohi atinaain tihane jere Abaraaun. Nii jaunte, Cana Coaunera rai tihane baiha, nacoauneein nii rai calaohi raelu. Nitohaneinte jataain chaque nelateineein nelu nii Abaraaun.

²⁰Cana Coaunera esenetaane jaun techu, rai calaohichuru- Jacobo, Esao, naaonjoainuri coroatajanerichain Cana Coaunerane coitucuhin cojiotaelu Isaca.

²¹Cana Coaunera esenetaane jaun techu, inae ohane rai netiin, rai calaohi Jose calaohichuru- le cachaauru cojiotaain coroatajanerichain Cana Coaunerane que aitiin, rai nuna que netemeriaain, Cana Coaunera coroajelu Jacobo.

²²Cana Coaunera esenetaane jaun techu, inae ohane rai netiin, Egipto caje mituururichain rai naraichuru Israelitacurune que aitiin, rai jaberoco amauruha acaauru jiniichaine coina aitelu Jose.

²³Cana Coaunera esenetaauruhane jaun techu, canaanaihuru soaajeratiha Egipto curuaanaa *reyne* jana, nejanoaa Moisesane jana casilanaala, nichata ateein asinojineein aina sirichurelu, jataain caohachajei canaanai nihane jaun, rai fojiaraauru.

²⁴⁻²⁵Cana Coaunera esenetaane jaun techu, *Rey* Faraaon cacunu, calaohi rijijieein nenea jerenihane jaun, inae ichauhenaneein rai naraaichuru- Cana Coaunera cacha neein nenacaauru aina jiniinquin cairichanojineein nelu Moisesa. Jaiti caa chauratane que osaonacaauru aina ichaohane bana.

²⁶Nitohaneeinte, jataain Cana Coaunera esenetaane jaun, rai cainarichaa in Cana Coaunerane coitucuha nota que coara rijijieeine jaun, Egiptoo raotojoei ichaonaa que ichaonaa nainihalune que jaolequii, jataain nii amuritoheriin nelateineein cacha ichoteratera- Mesihasi rijijieein cocoinanohineein necairichanaa jerihane jaun, naraaichuru rene cuelu Moisesa.

²⁷Cana Coaunera esenetaane jaun techu, sohin jaohane coina arichatiha curuaanaa *reyne* jana, casilanaala Egipto batane caje amuhin, ecu aina neein coarajiha Cana Coaunerane jana ainaan rijijieein, Aca jerihane rijijieein nelu Moisesa. ²⁸Nitohaneein esenetaane jaun techu, besetaneein neeni- Fasocoo janonaa nunuhe bitoaa in, sating Isaraelitacuru nenaja bacuujaauru rujuaerate ichana que Moisesa. Nabana Isaraelitaneeruhane calaohichuru ajichacuru atinaa Cana Coaunera letono anjerane coataa.

²⁹Cana Coaunera esenetaauruhane jaun techu, atane jacoro que ainaa rijijieein, cucuana jera jaorelu Isaraelitacuru. Jana Egipto cocoaichacuru acaauru caajie cuhalaain sating naluhin oorelu.

³⁰Cana Coaunera esenetaauruha Isaraelitacurune jaun techu, caainsi janoneein cojoanonetojoein cuhin, caainsi saneein Jericoo nese tinonocuruhane jana, neranuha tinonoritiin nenea nii ajeri caje ichanohineein nenea nii nese tinoritiin ucuuneti rijiane jana, sating cocoaichacuru sohin jaaorelu.

³¹Cana Coaunera esenetaane jaun techu, nii Jericoo nenacaauru cachaauru sohin jaoruhane ucuatoha, nii ecu nenea ene cojoaelorohe sohin jaaorenelu. Nitohaneein esenetaane jaun, acaauru letonocuru coroatajai cunacaauru raa raotojoein rai loreri asaaene jaun.

³²Jaitite lanacure Gedeeon, Baraca, Saansoon, Jefete, Rabiri, Samoeri, chaen *profetacuru*, naaonjoainunri que inara rai irihanune, nena inae jianeun.

³³Sating niichuru jetaote, Cana Coaunera esenetaauruhane jaun, lauri lauri nenacaauru atanecuru ruluhin jetao, jeriha Cana Coaunerane rijijieein ichaain jetao, acaauru rai niicha teeni Cana Coaunera aitoonjoan atane raaorelu. Tabaauru leon ucuha cuhane jaonojineecuruhane nihanating quinaa nainenelu leon, leoncuru ujuae fuhane coina, rai anjera letoaa Cana Coaunerane jaun. ³⁴Jana tabaauru jetaote, Cana Coaunera esenetaauruhane jaun, usi tabai jana jaonojineecuruhane nihanating, tonajelanaala usi caje nichoteeurelu. Chaen tabaauru jetaote, sabere caje nichoteein sonaana que casihuruhane saijieein, nii baiha nelararajiaain sonaana que acaauru que nejeratenacaauru amuritoorelu.

³⁵Tabaauru enecuru rai jetao techu, acaauru araaichuru onacaauru ichatecurelu.

Jana tabaaurute cairichanojineein neeruhane caje nichotena coacuelanaala oorelu, ooruhane nihanating Cana Coaunera aina raotojoei ichaonaa que

ichaaurichaaaine esenetaauruhane jaun. ³⁶Jana tabaaaurute acaauru nocoeje chanuhin bisinojoneein, *cadena* que ichoanojoneein caresero cuhane tenojoneein, naaonjoaurelu. ³⁷Jana tabaaaurute, ajeri que bodoosiin, sera que cataaun terunojoneein, sabere que sonojoneein, naaonjoaain oorelu. Chaen techu, cajihaneein amuhemu- jeein cairicheinejeein, carenero, cabra, naaonjoainuri ujui que cajionecoo- joein, cairichanojoneein nererjoe- caaeriin, naaonjoaain neeurelu. ³⁸Nii cachaaurute chauratane que, nelatihei rijijieein, cunaja coitucuelanaala cajihaneein, cacha areroo cuhin, ichatane ucuunno cuhin, ajeri jioararo jachu cuhane neein, atane jachu ucuacaain nenea cuhaneuru cuhin amuhemujeein nerejetocurelu.

³⁹Nete nitohaneein esenetaain neeuruhane coreniha cacha caohacha rijijieein coaranaaca Cana Coaunera natiin, chuni rai naitoonjoan niicha teeni tenelu, ⁴⁰cana coacuhin cana rai jataain caohachaneein niicha tei esenetaeraneein neinichaachene aina cuaain, acaauru netonai cana aina jiniiquuin esinae rauhijiriin caohacha icharaneein ranojoneein neeuruhane coina.

Jesoso coarajein nenea rijijieein, itolere bana queecha coaacuche.

12 ¹Nitohaneein inae cana que Cana Coaunera esenetaauruhane coaaratein coitucuhateeuruhalu nii cachaaurune jaun, jeriha Cana Coaunerane rijijieein ichaonaa jerichaa- chene nihanatiin itolere bana osaacha ichana coacuhin nihacachene coina cana acateraneein nenea jianein, canaacha esenetai jerenohi ichajein laraajiin ichaohacachenete caohachae. ²Aihane jaun, nii esenetaacachene jaan

tera neein aca cana suujua rucuhera- neein niha Jesosone jaun, queecha coaacuachenete ne. Inae nii baiha raotojoein rachoojoein Cana Coaunera rori- *trono* raotono nichajai que nelauriaain nerichaanne coitucuhane jaunte, rai nocoeje chanuhin coroso que tein atinaau- ruhane jana, coejenelu.

³Nitohaniane jaun, itolere bana Jesoso cairichaaeriin neeuruhalu osaaonacaauru cachaaurune que, inara suujua cuhane coaacuche. Aihane jaun, chatothanei coaraain neeichene nihana- tiin, jiaonriha coiinteein esenetaachene jianequichene. ⁴Niheichu nii osa que nesarucuhichene coataa necairichanaa coraquichene jaun coreniha oriheei- cheein. ⁵Nete inae inara, rai calaohi suujuatiha casetecaane rijijieein, inara suujuatiha inara casetecaa Cana Coaunerane jaan baitequiche. Rai Quiricha cuhanete:

“Jiaonriha
ii suujuatiha, ii casetecaa
Cana Curuaanaa que jaolecoina
cacalabi.

Niheichu
baaso ichaaaine coreniha
ii casetecaane,
nainiheei
esenetaaine jianeine.

⁶Niicha belaaite suujuate
Cana Curuaanaa.
Jerichanejeein techu,
rai calaohi rijijieein
niicha rai casetecaain ne,”
naain ne Cana Coaunera Quiricha
cuhane.

⁷Nitohaniane jaun, inara casetecaane abaantaain neeichenete, rai calaohi belaihaneein inara belaiheein Cana Coaunera. Nihei chuni canaanai- inacaacha suujuateinelanaala nei. ⁸Jana rai calaohi rijijieein nenacaauru casetecaa

suujuatihane rijijieein inara suujuatiha, inara casetecaeniha Cana Coauneranete, rai calaohi esinenelanaala, rai nere tonorae neeichene jaun aicheein. ⁹Chaen techu, caa chauratane que nenacaauru- cana fojiaraauru- cana casetecaain cana suujuateeuruhane, tonoraain nerejetocoaachelu, tonaain erenaa coacuelanaala. Nitohanihane jaun, cha caaunna nii amuritoheriin dedeeu nenea Cana Inaca Cana Coaunera cana suujuatiha, cana casetecaane abaantaain nenerihacache, chabana satonohelanaala nenea ichaonaa raacachene coina. ¹⁰Cana fojiaraaurute, jaiti caa chauratane que ichaohacachene jana, nechu raujiaain acaauru jerecuruhane rijijieein nihacachene coina, cana suujuateeurelu. Nete Cana Coaunera laen, Nesineneein caohacha icharaneein nihane jaun cana rai caohacha ichaa cana suujuatiha cana casetecae. ¹¹Coatiha niqui raotohi caseteco coaracaane, rijieeoritiin cunaain tacaane jaun. Nete nitohaneein cana teein cana relaera tonoraain ichaohacane, rauhijiriin raotojoei ichaonaa que ichaohaca.

Jataainte elunae cana rai Cana Coauneraacha beratei que jaolecohacane

¹²⁻¹³Aihane jaun, nacoauneein nelararajiaain caohachaaain ichaaoche. Nacoauneein caohachaaain rauhijiriin inara suujua coaraain ichaohin, jerichanejeein nacanacaana coacuelanaala neeichene coina.

¹⁴Satiin cachaauru aina raotojoeein ichaaoche, cojoerihu jeriha Cana Coaunerane rijijieein ichaohichene coina. Jeriha Cana Coaunerane rijijieein ichoaniha cachane, nihei chuni Cana Curuaanaa coarana nainerinaain. ¹⁵Atiin jiniinquin, jeriha Cana Coaunerane rijijieein, ita coroatajaneein neeuche. Nabana chuni nitohaneein nihane jianihane, cache atinaa ajaena corainei rijijieein leochaauru ichao aasaecane

coataa. ¹⁶Jiaonrihachu chunocoha inara caje, nejelau ene aina ichaohane. Niheichu rai Cana Coauneraacha tei que jaoleconaa nainihe. Nitohaneein ichaane jaunte, nechu lenoneecha coreniha, aca nihana saijieein, raineein nenea telu rai nocoala rai Esao. ¹⁷Nii jaunte, nii coitucuhichene rijijieein, rai caohachanu tiha rai inacane coina bajaane saijieein telu rai inaca. Mainajein chanaain bajaane saijieeinte, telu inae nitohanihane jaun.

¹⁸Nete laen inara, aihuruhalu Isaraelita-curune rijijieein, chatohanai dadaain coanacai, usineein iihanei, nocohena tabai, cujuana tabai aina nocohena, naaonjoain nenea rohan nii nichuuntae-neeiche. ¹⁹Niheichu toniha jaihane aonaheiche. Niheichu toniha Cana Coaunerane aonaheiche. ²⁰Nii aohanraauru jetaote laen, nii naitoonjoan tonorana nainesihurenihane jaun, abaantasilanaala acaauru rai iriha Cana Coaunerane jianeratecurelu. “Chunocoha, caa nihanune jaan- ichtatane ucuunno rohan nichuuntaain, ecu turuhin, jelai shaquiin, naaonjoainte ajeri jaberoco, rejoin, naaonjoain que sohin jaonojoineereein, lenone neein aihane nihanatiin” naain iriha Cana Coaunerane jaun.

²¹Nitohaneein jataain coasinacaa, nii acaauruhacha coaraine jaun jetaote: “Jataaine rijijijianeun canu nesoone caaunra” nae jetao Moisesa. ²²Nete laen inara nii amuritoheriin, Cana Coaunera nenaja esine Sioon bichatane ucuunno, dedeeu nenea Jerosaleeun nichuuntaaiche. Chaen techu oaraana neein netaojiaain Cana Coaunera coroaecuruha coina, netaojiaain neeuruha anjeraaurune jana coaraqiche. ²³Chaen techu, ichoaichaniha Cana Coaunera calaohi neein dedeeu cocoirichanojoineein nenacaauru rohan turuhin coaraqiche. Nitohaneinte satiin caohachaaain ichaonacaauru cachaauru, aca jerihane rijijieein tein niicha

ranojoihnuru rai Joesionein nenea- Cana Coaunera rene turuhiche. ²⁴Chaen techu nii ena nenea Cana Coauneraacha teratei teraneein nenea Jesocurisito- rai coichana que cana couluoorane maajeein coaraqiche. Nii rai coichanate jauriaanejeein cana cairichaeranu que nihalu Abeli coichana jana, jataain nii amuritoeriin cana rai nelateineein ne.

²⁵Nitohanihane jaun, cana rai ereein niha Cana Coaunerane que jaolecohin, batiin neeichene que necohalajiin neeuche. Coaracuche nachuhinti nii jaiti cau chauratane que ne bana, suujuatenajaane coina Cana Coauneraacha cotihacurilu, caje nichotena nainecururaha. Aihane jaun, nii amuritoheriin nichotena nainerihacacheein dedeeu netiin cana suujuatihane que jaolequiin nihacachene. ²⁶Nii iriha Cana Coaunerane bana jetaote, nii rai nereecha caun nerurujaelu canarai chauratane. Nete ena laen: “Nacouneeina chauratane rurujuareunni le sajeein. Coatiha Chauratane nerea nerurujuareein, cana rai dede netonaite nerurujuareein,” nae Cana Coaunera. ²⁷Niritiin: “Nacoouneein le sajeein” naain aitohanete, satiin niicha coaunanojoneein nerurujuanaa naineein nenacaauru itajihane jana, nerurujuanaa nainelanaala nenaacha nedaane coina aitoa Cana Coaunerane coitucuerate cana que. ²⁸Nii cana rai Cana Coauneraacha tei- rai Cojoanonaate chabana nitajena nainene. Nii coreniha “Narihara Cana Coaunera,” naain jiniiquiin rai cachaneein neeuruhane coarateein aca jerihane rijijieein coroaeraauru aina coaroaecaachenete ne, ²⁹itolere baaso itajera- usi rijijieein niha Cana Coaunerane jaun.

Naonjoaain, rai suujua rijijieein nihacachenete jere Cana Coaunera.

13 ¹Jiaonriha ita nejeraneein nenea rijijieein, jiniiquiin ita belaaain neeichene jianein neeichene.

²Niheichu inara rene turunacaauru belaaain raachene jianein nenea nainiheeiche. Nitohanein nenacaaurute, acanihane coitucuelanaala Cana Coaunera letonocuru anjeraaurune maajeein raurelu rai loreri asaae.

³Aitiin caresero cuhane nenacaauru netonai coaacuche, acaauru aina jiniiquiin caresero cuhane nenea rijijijieein. Chaenchu cairichaerinojoneein nenacaauru netonai coaacuche, inara netonai acaauru rijijieein cairichanojoneein nenea nainequichene jaun.

⁴Nitohanihane jaun, inara quichaaauru, enecuru, naonjoaineeichene nisiriha- teein neeichene, itaque inara suujua acatein, leecha inara sinijerane lanaala nenea coacuelanaala, inara sinijera ainaacha ichaaoche; satiin baaso ichaain rai sinijerane lanaala nenea aina ichoai casetecarichaain Cana Coaunerane jaun.

⁵Jiaonrihachu coriquiicha que coacuhin neeichene. Inara rucuhele inaraacha sirii ainaacha raotojoein ichaaoche: “Chabana nihei inara jianein inara que jaolecohanune” naalu Cana Coaunerane jaun.

⁶Niritohalu cana rai Cana Coaunerane jaun chaque tonajelanaala nainichaache:

“Cana Coaunerate canu coroatajane- ranein ne.

Nii jaun chaque casinaaun.

Chatonai ichana nainihei canu que camute cacha,” naain erena nainichaache.

⁷Inara suujuatein Cana Coaunera ere que inara relaaureralu coacuhin, acaauru ichao que coacuhin, esenetaain ichaauruhane rijijieein ichaaoche.

⁸Jesocurisitote jeelainein nereein, chabana satonoelanaala. ⁹Aihane jaun jiaonriha nelajau cuain inara relanaa-

jerera nihane, rijitjoein esenetaain neeichene. Nii amuritoeriinte jataain nelate, jeriha Cana Coaunerane rijijieein cana suujua ilaain ichaohacachene. Coatiha chaque nelatihei, nii niicha quiinelanaala nenea iniho quiniha cachane nihanatiin. Coatiha chabana cana rai chaque nelatejeehai nii.

¹⁰Canate coroso que ohalu Cana Coaunera Calaohi Curisitone coreniha jianacon osa caje nihacache. Nii *santuario* tein saseredotecuru ichanaa coatiha inae chaque nelateein nedaai.

¹¹Jana jauriaanejeein nenaalute, saseredotecuru curuanaacha lenonecuru sohin, *santuario* cuhane rai coichana terejetelu osa anihoaeraanu que. Nete laen, nii lenone jaberocooru, acauru loanari caje naain amaain jelai tein mocorejetocurelu.

¹²Nii rijijieein techu Jesoso netonai, naain nese caje amaain jelai tein atinanohinelu; rai coichana que satiin rai cachaneein neinichaachene culuocane coina. ¹³Aihane jaun, aina jiniiquiin nese caje amanajoinein cana netonai necarichanaa abaantacachenete ne, aihalune rijijieein.

¹⁴Coatiha caa chauratane que nihei cana rai leeinjin nese chabana nitajenaacharanejeein nei. Nii jaun, chabana nitajenaacharanejeein nenea ariirijiacachenete ne.

¹⁵Aihane jaun, itolere bana Cana Coaunera coroaecaachenete ne, rai Calaohi Jesocurisito aina cuaain. Nii Cana Coaunera coroaecaachenete belaiha rai canaacha teenineein nereein. Aihana jaun cana ujuaae caje coroaecaachenete ne.

¹⁶Jiaonriha caohacha ichana baitein, leeochoaauru rai inaraacha sirii tein naonjoaain neeichene jianequichene. Nitohaneein ichoait rautaaain coarae Cana Coaunera.

¹⁷Inara relaaurera ere tonoraain jerecuruhane rijijieein neeuche. Acaaurute nebetacaelanaala inara beraaihure, Cana Coaunera rai jitaain

inara aina nichanaa beeuruhane rai neeuruhane jaun. Aihane jaun, acaauru jerecuruhane rijijieein, inaraacha ichai ichaain neeuche; acaauruhacha rautaa ichaelanaala. Jana aineechene, coatiha inara rai chaque nelateriaain inaraacha ichai.

¹⁸Atiin canacaanu coreniha Cana Coaunera bajaauche. Jataain raotojoiha canacaanu suujuanena jerichaanu; itolere que caohachain ichana jerichaanune jaun. ¹⁹Jataain inara aina nacoauneein nenea jerichaaunne jaunna, inara aina nihanune coina Cana Coaunera bajaaiichene coina, inararai aitoon.

Raotojoein jiniiquiin neeuche.

²⁰Rai coichana aina cuaain chabana satonoelanaala nenea ichaonaa tera- rai cachaneein nihacachene beraichaneein nenea- nii o caje Jesoso ichatera Cana Coaunera, ²¹inara ichao rucerateeine Jesocurisito que, aca jerihane rijijieein cha chaain neeichene coina. Chaen Jesocurisito aina cuaain canacaanu que niicha jerei ichamiin. Itolere bana satonoelanaala, Curisitoneein niha Curisitone coitucurumiin satiin cachaauru. Bajaanachuhinti aihurene.

²²Atiin raotojoein caa inara suujua nunaeraanu que inara rai canuhacha laenai raauchera canejeraauru. ²³Cana nejera Timoteeote, inae caresero caje mitue. Enanacoojoa turuhanena, inae inara coaraa uhanune, canu jiniichaain uhareunni.

²⁴Satiin inara bichauhenaauru aina, satiin Cana Coaunera cachaneein nenacaauru rai, acauru coaaucaaanne beeuche. Italiau nenacaauru netonoaite inara coaacure.

²⁵Jataain jeelai amuritoeriin inara coroatajanemiin Cana Coaunera, satiin raotojoein neeiche.